


ONTARIO KIHCI OKIMAW

KOSHKOSHILIWI KISKELIHTAMOWI APACIHTAWIN



ROWAN'S LAW

PIWAPISK MASILAHIKAN: KA NIYANOSHAPI PIPONESICIK NESTA AWASITE


Ontario 

Ka kipihcihtaliwahki miswakaniwila kistentakwan ke ohci kishishawisicik ililiwak e iskani pimatisicik. Atiht miswakaniwila wehtan kici wapahcikateki nesta ntohkohtaliwahki shakoch ka mishwakaliwit awena pihci oshtikwanilihk maka wila? Mintiphik miswakaniwila tapiskoch ka otamistikwaleshihk awena mola ta lokwan walawitimihk nesta mola moshak ta payahtelakwan. Ata ispi eka ka wapahcikatek miswakaliwit awena ka ki koshkoshihk kiyapich ta moshihtaw ka ki ihtit nesta nta ntawentakwan kwayask nakatawentakosit ke ohci milopalit.

Oma apacihtawin ki ka wicihikon ke ohci kiskilohamasoyan ka koshkoshinaliwhak maka kina tipilawe nesta kotakiyak kici kishisawesiyet nesta nakatawentakosiyeck ispi ka kashkihoyan e metaweyan, ka kiskilohamasoyan, e onikihikomawiyen, ka kiskilomawacik ka metawecik, ka okimawiyen nesta piko ka kiskilohamakeyan.



KEWAN ANIMA KOSHKOSHILIWIN?



Koshkoshiliwin e kwalima mintipihk ka miswakaninaliwhak. Mola ta wapahcikatew shapwapahcikalihk, nanahkaw e ohtapiskahikate shapwapahcikan nesta piko ka maskawak shapwapahcikan ke ohci lokwahk kekwan ka shapwapahcikatek. Ta ki ahcipaniliw awela ka itentahk, itamahcihot nesta piko ka ayihhtotahk.

Oshtikwalik ka ohcishihk, ohkwakalihk nesta okwayahk ta ki ohci koshkoshin. Koshkoshiliwin nesta ta ki ohcipaliw e otamishihk awena wiyawihk kishashpin e otamishihk wiyawihk maka e koshkopanilik wintiph pichi oshtikwalihk. Matika tapishkoch e tawihikot tohana oshtikwlighk nesta piko kelikohk e otamishihk mohcihtahk.

Ka koshkoshinaliwhak mishtahi ta ohci miswakaninaliwan Maka ata tahtwa nakiskaw ka, koshkoshiliwin ta ki ihkin kici ohci nanosami ahkosinaliwhak nesta wawish wila kilowesh ta ohci ashkosinaliwan tapiskoch kanohkewin minipaliwin nesta piko kohpatentawin.



KE OHCI KIPICIHTALIWAHK EKA KICHI KOSHKOHTIHK MIYAW


Nishtam kiskilohamaso anima e koshkohtihk miyaw

Nesta ki ka ihtoten:

- Kishtilach kila nesta aniki ka metawecik apacihtacik apacihtawila ka milwashiniliki.
- Kishtilach kila nesta aniki ka metawecik ka nanakacihacik kici kishkahkik apacihtawila kwayask ka nahishkahkik.
- Kishtinach kila nesta aniki ka metawecik kici kistentahkik itashiwewila anta metawewilihk;



- Otilamaso anta ki metawewilihk mamawicihitowilihk nesta kiskilohamatowikamikohk miyawi koshkoshiliwi itashiwatikosiwlan nesta kistilach aniki ka metawecik peyakwan kici ihtotahkik.
- Kahkaciwita ka kanawentakwahk nesta ka milwashik misew awela ohci ke ochi wihtahk ispi ka ahkoshihk awela. Ihtota kishtinach misiwe kici nisitotahk ka ohci nanisanelihkawahk eka ka ayaminaliwahk.




E NISITAWILIKATE MIYAWI KOSHKOSHILIWIN

◆ HIT. STOP. SIT.

Misiwe awela taki wicihtaw e nisitawilitatek ka koshkoshilikwe awena kishapin ka kiskentahk kekwaliw ke latawapahtahk nesta piko ke nanatawi ntotahk.

Awena ka koshkoshihk taki lokwaliliw peyahk nesta piko awasite ke ohci wapamiht nesta piko ka ihtikwe ka lipitesilateki ota chapashish. Ta moskipaniniliw newach nesta piko mihcheto pisimohkan wawish wila micheto kishikawa wiskata. Peyak piko ka lokwahk nesta piko ka ihtikwe e kwali tepilahk ke ohci kiskelihcikatek e koshkoshihk awela. Mechet awelihkanak ka koshkoshihkihk aspin mola kiskisiwahk.



Osam tahtwa ka lokwahki nesta itaspilewila ka koshkoshihk awena:

MIYAWIHK:


- Tewishtikwanew
- Sihtamacihtaw oshtikwan
- kishkwepaliw
- Wi pakomomahcihow nesta piko pakomow
- Pikishelam
- Ta nesitamihikow e washktelik nesta pika e lohtakwanilik kekwaliw.
- Ta ciwehtwakew
- Ta wi pahkisin
- Ta ayeskosiw nesta piko ta lishikalew
- Ta nestosiw
- "Mola piko ta milomahcihow"

MOSHOHOWILIHK:

- Ta watakamisiw (ta wetisiw kici kishiwasit nesta piko kici kishiwentahk).
- Ta kohpatelimiw
- Ta pikiskatam
- Ta nilikelimiw nesta piko ta mikoshkatentam


MITONENCIKALIHK (METONENTAMOWIN):

- Mola kwayask ta mitonentam
- Ta pehkacipaniliw e mitolentahk
- Ta waloshkowentam
- Mola ta ki kwayaskwentam
- Mola ta ki kanohkew



NIPAWILIHK ITEHKE:


- Kilowesh ta nipaw
nesta piko mola ta nipaw
- Ta alimisiw kici liskihkwamit



KEKWALA KA WIHTAMAKOLALIWAHKI:

"Kekwala ka wihtamakolaliwahki" maskoch ka wihtamakon mishi ka pashinewale. Ispi kekwan ka wihtamakoyan sesikoch kewan ka ihkichk ishi kanawapahta makat 911 tepwata.


- Ka moshihtayan ki kwayaw nesta piko ka kakitisiyan
- Lishow kekwan ka wapahtaman
- Ka nilamisiyan nesta ka kakinakpaliyan kispitolihk nesta piko kiskatihk
- Ka kihci tewishtikwaleyen nesta pika awasite ka ati kihci tewishtikwaleyen.
- Ke ocipitikawiyan nesta piko kehtatawin ka ocipitikawiyan kiyawihk
- Aspin eka ka kiskisiyan (e pahkishiniyan aspin)
- E pakomoyan mola pika peyakwa
- E kikitwa ihtiyan, eka e wi minwentaman nesta piko e wi mashihkeyan
- Awasite e ati waloskawentaman



KEWAN KE ATI IHTOTAMAN MINA?

Kishaspin ka miyawakentamowane ka koshkoshik awela, Ikatesi anta ohci nesta piko ana awena ka nanakacihat wipac anta ohci ka ishi ayihtotamek kekwan. Kiyapic anta ka ihtayan nesta piko an awena ka koshkoshinikwe ta ohci nanisanelihtakosiw awasite mistahi kinowesh kici ohci ahkosit. Tepwash olikihikomaw nesta piko okananawasow (aniki ohci ka metawecik nohtaw niyananewishap ka itahto pipolesicik) nesta piko sesikoc kekwaniliw ka atoskatahkik. Kawila nakash awena kici peyakot ka koshkoshilikwe ka itelimiht.

Piko awena ka ki ikateniht anta metawewilihk ka ki koshkoshik ka itelimiht ta wapamepan ntokolona nesta piko ntokoloskwewi ot atoskewa kihci wipac. Ana awena mola ta kiwe ihtotamopan kewaniliw eka ka nanakacihtaniwanilik kiskilohamasowilihk e kakweci ihttocikatelik metawewilihk nesta piko ka wi kakweci paskinatonaliwanilik patima wapamikot ntokolona nesta pakitashowatikot ciki mila metawet.



E ATI MILOPANILALIWAHK

Mihcet awenihkanak ka koshkoshihkihk ati milopaliwak peyak pinish new tawashtew. Atiht awelihkanak normanak nawac. Pahpitosh ihkin ka koshkoshinaliwhak. Kawila kotak awena ta kalawapahcikateliw ilikohk ka ati milopalit.

Taki ihkin kici nanosamaspinaliwhak ispi ka koskoshinaliwhak. Awelihkanak ta ki moshihowak nanahkaw itamahcihowila ta piskoc tewishtikwanewin, tewisiwin mikwayahk nesta wapiwilihk ahkosiw in atiht misiwa nesta piko wawish wila mihcet pipona. Atiht kilowesh ta ahcipaniliw wintihpiwhak ke ohci moskipanihk kewana tapiskoc eka eki kalohkecik kekwaliw nest eka eki kwayaskwentahihk nesta piko kohpatelimowin. Eka sohki ka ihkihk ana awena mihcet mistahi ka mishwakalilit wintiphik eka ka kiket ta ki ohci nanisanisiw e pakipanilik wintihpihk naskawi koshkopaliwin ka ishilihkatek ke ki ohci mistahi mishakaliwit nesta piko nipit.

Mekwac ka ati milo pimatisit awena e ki koshkoshihk mola kekwaliw ta ihotamopan awasite ke ki ohci ahkosit. Maskoc ta itentakosiw kici nikilamasot

otayihtotamowila tapiskoc e kakwecit nest ka chahkastepaliki kekwana ka apatahki nest ka piko kiskilohamasowin.

Shashipinewisiwin ntawelihtakwan ke ohci milwacihihataliwhak koshkoshiliwin. Newac ka locihtaliwhak ihotamowila mila awasite ta ohci ahkosinaliwan nest ka kilowesh ta ispaliw kici milopimatisinaliwhak.

Awena ka ki koshkoshihk ta wihtamawepan kotakiya awelihkana. Ekwaliki olikihikomawak misiwe metawewina nest ka mamawi wici metawemitowila kiskilohamatowikamikwa ka kiskilohamakecik metawewila nest ka kiskilohamakecik.

Maka kiskisi. Ka kiwaliwhak kiskilomahatowikamikohk mawac milwashin ispic ka kiwaliwhak ka nakashiwatek metawewin.



KA KIWALIWAHK KISKILOHAMAWATOKAMIKOHK NESTA METAWEWILIHK

Ka metawecik and ka kiskilomasocik ka ki miskakoci ntolola nesta piko ka ntokololiskwewi atoskelici e ki koshkoshihkik ta losonehamwak metawewi mamawicihitowi ka ki waliwahk metawewilihk itashowewin nesta piko ispi ka ishi apatisimakahk alimeliw kiskilomawatowikamikohk ka kiwaliwahk kiskilohamawatowikamihohk olapatamowilihk.

Ka metawecik nesta ka kiskilomasocik ta wici apatisimepalik milo pimatisiwilihk okashkihowa nesta metawewi mamawi wicihitowilihk nesta kiskilohamawatowikamikohk kici oshihtacik tipan pehpeyahk otolapahtamowiliwawa ke ohci kiweck metawewilihk nesta kiskilohamatowikamikohk.


Anima Olapahtamowin E kiwaliwahk Kiskilohamawatowikamikohk (Kiskilohamasowin nesta E Ayahcinaliwahk)

Ka kiskilohamsocik ka oshki kihcitacik nesta ka ishpalik kiskilohamawatokamikoliw nta ntawenlihtakosiwak kici losonehahkik kiskilohamawatokamikohk ot otolapahtamowiliwawa ka kiwaliwahk

kiskilohamawatokamikohk ka wicihikot okiskilomawaso neshihkac ciki kiwet okiskilohamasowilihk nesta ciki kiwet ihtotahk miyawi metawewila. Ayamihihkok kiskilohamawatokamikohk awasite wihtamakewin ohci.

Ka losonehikatek ka kiwaliwahk mina kiskilohamawatokamikohk

Kekat misiww ka losolehikateki mina ka kiwaliwahk kiskilohamawatokamikohk kakwecitwemakanwa aliki ka metawecit ta alawepipalik nishitala lew pilish lemitana liyalanew pisimohkana pwamashi neshihkac ka ati kiweck mina metawewilihk. Ana ka metawet mola mila ta ati locihtapan ka nakashiwackateliq kiskilohamasowi kiskilohamakewililiw nesta kakwechihtwawila nesta ka wi kakwe paskilatoaliwalilik patima ka pakitashiwatikot ntokolona.



KA KIWALIWAHK
KISKILOHAMAWATOKAMIKOHK NESTA METAWEWILIHK

Anima ka tapasilahikatek ota chapashish pakitalamomakan nepite takoskewila nesta ayihtotamowila tahtwa ka miskikateki kekat misiwe losonehamowila ispi ka kiwaliwahk metawewilihk nesta olapahtamowila kiskilohamawatokamikohk ka kewaliwahk kiskilohamawatokamikohk.

Tapasilahikan: Tahtwa ka ihtocikateki neshihkac ka kwalihwahk metawewilihk ka losolehikateki

Ka ihtocikatek	Wa mishocikatek	Ka ihtocikateki	Wa otisapahcikatek ihtotamowin
1	Eka awasite ke ohci ihtinaliwhak ihtotawila	Tahto kishikaw ka ayihtocikateki eka awasite ke ohci ihtinaliwhak e ayahcinaliwhak pihci ka ishi wikinaliwhak nesta piko ka wehtahki apatisiwilisha.	Neshihkac tahto kishikaw mila ka ati locihtaliwhak kiskilohamawasowila nesta apatisiwi ihtotamowila.
2	Ka ayahcinaliwhak apishish	Apishish ka ayihtocikateki ka ishpahkepalik mitehi apishish tapiskoc e papamohtaliwhak nesta piko ka apit ka kilikwalwepishkaht metataht pnlish niyaloshap milikoshish.	Ishpahkepalihtha mitehi
3	Ka tapahikateki metawewila mashkawisiwin ohci.	Pehpiskihc miyawi ihtotamowila tapiskoc pimpahtawin nesta piko papamatahiwewin. Eka ka otamishkatonaliwhak nesta piko ihtotamowila mistikwan ke ohci otamihihk.	Ayahciwin kici nahkilikatek.
4	Eka ka otamishkatonaliwhak e kiskilohamasonaliwhak mitawewin e kakwecihtaliwhak nesta kotakiya mitawewi kiskilohamasowila	Ka alimahki kilikohk kiskilohamasowila mitawewila. Awasite ke ohci sohkit kiskilohamasowila (kishapin ka apatalikwe)	Kakweciwin, ke ohci mitonicimakahk miyaw nesta awasite ke ohci milopalik mitonelihcikan.
5	Eka ka nakashiwacikatek metawewi kiskilohamawasowin.	Eka ka nakashiwacikatek metawewi kiskilohamawasowin – maka ka otamishkatonaliwhak tanta ka ishi apatahk.	Ke ohci kiwe ihtakwahk mashkawentamowin nesta ke ohci ohtilikatek ke wicihikonaliwhak kashkihadawila.
6	Ka kiwe otilikatek metawewin.	Eka ka nakashiwatek metawewin nesta piko ka we ka kwe paskinatonaliwhak.	

Pakitashowacikewin ntokololin ka ohcipalik moshak ntawentakwan pwamashi kiwet metawewilihk ka metawet eka ka nakashiwatek kiskilohamawasowin kakwecihtawin, metawewin kiskilohamawasowin nesta piko ka kwe paskilatowin.

Natawi kiskenta kit metawewi mamawi atoskewilihk anihu kihciwe tahkoskewila ke losolehamowane.

Ka metawet ta itentakosiw kici ati losonehahk mina animeliw ka ihtocikatelik ispi ke ki ihtotamokwe anih ihtotamowila anih aloc ka ihtocikateliki ek ka ohci ihtakwaniliki nesta piko awesite ke ohci ahkosikwe. Kisaspin awasite ati ihkike alih ka ati ihtocikateki ta polihtaliwalopan maka ta kiwe ihtocikatepan alima otalahk ka ki ihtocikatek. Anih pehpayak ka ihtocikateki kanake nistala new tipahikan pisimohkan ta ispalipan kici kishihtaliwahk. Kisaspin ek ka ati milopalikw nesta piko awesite ka ati ihkilikwe ka ihtikwe ana ka metawet mila ta ntawapamaypan ntokolona nesta piko ntokololin iskwewa.



KISKISOMIWEWIN

Kiskisi:

- 1. Nisitawila ka wihtamakemakahki nesta ka ihtotakolaliwahk ka koshkoshinaliwahk nesta ikatesi** anta ohci nesta piko ana ka metawet anta ohci metawelihk nesta kekwaliw ka ihtocikatelik ata kisaspin ka milomahcihowane nesta piko atoskam mila wayesh ihtiw ka itikowane.
- 2. Ka Nanatomik nesta piko ana ka metawet ta nanatomiko** ntokolola nesta piko ntokololiskwe atoskelici.
- 3. Neshikac ka kiwewaliwahk wicihiwewin** kiskilohamawatowikamikohk nesta metawewilihk.





Rowan Stringer

◐ ROWAN'S LAW

Oma piwapisko masinahikan ekoma paski alima Rowan's Law koshkoshiliwi kiskelihtamowi apacihtawila. Rowan's Law ekwali ka ohci islihkatek Rowan Stringer ka ishilihkasospan kiskilohamawatokamikohk ka ki tohat Ottawa kihci ihtawilihk ka ki nipispan e sikwanilihk ka ki koshkoshihkipan (eki pakipalik wintihp ka ki mishwakaliwit eki ihtikopane otanahk maka eka eshwa e ohci kikekopale. Awa Rowan itelimakanawn listwa eki koshkoshihk nkotwaso kishikawa mekwac e tohat. Ki koshkoshilikopan maka mola ohci kiskentam wintihp e ntawentakwalilik pitam kici kikelik. Mola nesta onikihikwa nesta ka kiskilohamakot nesta ka kiskilohamakot metawelihk.

Anihi apacihtawila mola itencikatewa e pakitilikatek ntokololi mamilokemowin milo pimatisiwilihk pamihiwewilihk itehke. Mamilohkemowin milo pimatisiwi pamihiwewin ohci koshkoshiliwi itaspilewila ohci ekoshi ayamihihk ntokolon nesta piko ka ntokoloni atosket.